



*Inkombe*

*William Marrion Branham*

# Inkombe

Ku

## *Nshita Ya Lukuta Lwa Laodikea*

Ukusokolola 3:14-22

Na kuli malaika wa lukuta lwa mu Laodikea lemba auti: Efyo asosa Ameni, Inte ya Cishinka kabili iya Cine, ukutendeka kwa Kulenga kwa kwa Lesa;

Naishibe milimo yobe, tauli uwatalala nangu uwakaba: Kuti natemwa ngawali uwatalala nangu uwakaba.

Eico kanshi pantu uli uwa cifulefule, kabili tauli uwakaba nangu uwatalala, Nkakufwisa mu kanwa Kandi.

Pantu utila, Ndi wa fyuma, ukucindama nincindama, kabili nshilekabila kantu nangu kamo; kabili tawishibe ukuti uli uwa nkumbabulili, kabili umulanda, kabili umubusu, kabili impofu, kabili uwa bwamba:

Ndekupanda amano ushite kuli Ine gold uwalopolwa ku mulilo, ukuti ucindame: na malaya ayabuta, ukuti ufwale, kabili ukuti shimonekela insoni sha bwamba bobo: kabili ukusuba amenso yobe no muti wa mu menso, ukuti umone.

Bonse abo Natemwa, Ndabebaula no kufunda: e ico cincila, no kulapila.

Mona, ninjiminina pa mwinshi, no kukunkusha: ngo muntu aumfwe shiwi Lyandi, no kwisulako ku mwinshi, ndi nokwingila kuli wene, no kulila pamo nankwe, na wene alelila pamo na Ine.

Uwacimfya Nkamupelo kwikala pamo Naine pa cipuna Candi ca bufumu, ifyo naine nacimfishe, no kwikala pamo na Tata pa cipuna Cakwe ica bufumu.

Uukwete ukutwi, omfwe ico Umupashi ulesosa ku nkuta.

# Inkombe

Ndetwishika nganshi nga cakuti inshita ili yonse icine cine yalishibe inkombe iyo Lesa atumine kuli yena, kano fye mu nshita ya ntanshi umo Paulo ali ni nkombe. Kabili nangu ni muli ilya nshita abengi tabamwishibe pa fyo ali.

Nomba inshita iyo tuleikalamo ili nokuba imo iipi sana. Ifintu fili nokucitika bwangu sana. Eico inkombe ya kuli ino Nshita ya Laodikea ilingile ukuba muno nomba, cibe limbi tatulati tumwishibe na ino nshita. Lelo kuli nokuba mucine inshita iyo akesa ishikwa. Nomba kuti nashininkisha ico pantu twalikwata Amalemba ayalondolola pali bukapyunga bwakwe.

Icakubalilapo, ilye nkombe ikaba kasesema. Akakwata iofeshi lya kwa kasesema. Akakwata bukapyunga bwa busesemo. Bukaba bwa kushintilila fye ndi pa Cebo pantu lintu asesema nangu nakwata icimonwa, lyonse cikalaba fye “Icebo icalangishiwa” kabili cikalafikilishiwa LYONSE. Akashininkishiwa nga kasesema pa mulandu ena takalufyanyepo. Icishininkisho icakuti ni kasesema cisangwa mu Kusokolola 10:7, “Lelo mu nshiku she shiwi ya nkombe iyalenga cine lubali ilyo alaswa alishemo, elyo cikafishiwapo ica nkama cakwa Lesa ifyo Alandile bwino bwino ku babomfi Bakwe, bakasesema.” Nomba uyu muntu, uyo muli iyi versi aleitwa ukuba “malaika” mu bwilulo bwakwa King James TALI icibumbwa ca mu mulu. Malaika uwakulisha ipenga uwalenga mutanda, uyo ali cibumbwa ca mu mulu, ali mu Kusokolola 9:13, kabili uwa cine lubali uwamusango uyu wine ali mu Kusokolola 11:15. Uyu uli pano mu Kusokolola 10:7 ni nkombe ya nshita yalenga cine lubali kabili ena muntu, kabili ali nukuleta imbila ukufuma kuli Lesa, kabili imbila yakwe na bukapyunga fili nokupwisha inkama yakwa Lesa ngefyo alanda ku babomfi Bakwe, bakasesema. Lesa ali nokucita iyi nkombe yakulekelesha nga kasesema PANTU ENA NI KASESEMA. Ifi efyo Paulo ali mu nshita ya ntanshi, kabili ne nshita ya-kulekelesha yalikwata umo, nayo. Amos 3:6-7, “Intandala nga yalishiwa mu mushi, bushe abantu tabatutuma? Nga mwaba ububi mu mushi, bushe Yehoba te o acita? Pantu Shikulu tacita kantu, kano abala Asokolwela ifya nkama Fyakwe ku babomfi Bakwe, bakasesema.”

Cali ni mu nshita yampela ilya ilyo ifibulumo cine lubali fyakwa Yesu fyaishile isa. Ukusokolola 10:3-4, “No kubilikisha ne shiwi likalamba, nge nkalamo ilelila: kabili ilyo abilikishe, ifibulumo cine lubali fyalandile ku mashiwi ya fiko. Kabili ilyo ifibulumo cine lubali fyalandile ku mashiwi ya fiko, natile nembe: lelo naumfwile ishiwi ukufuma mu mulu lileti kuli ine, Kakatike ifintu ifilandile ifibulumo cine lubali, kabili wifilemba.” Ifyali muli filya ifibulumo tapali nangu umo uwaishiba. Lelo tulingile ukwishiba. Kabili cikasenda kasesema ukukwata ubusokololo pantu Lesa takwata inshila naimbi iyakuletelamo amabusokololo Yakwe aya Mumalemba kano fye ukupitila muli

kasesema. Icebo lyonse caishile ukupitila muli kasesema na lyonse efyo cakulaba. Ukuti ici e funde lyakwa Lesa limoneka nangu ni pakufwailisha fye Mwilembo. Lesa ushipilibuka ne nshila shakwe ishishipilibuka lyonse atuma bakasesema Bakwe mu nshita ili yonse umo abantu balubantike ukufuma mu mitantikile ya Bulesa. Naba bonse bakasambilila wafya bulesa na bantu panuma yakutaluka ukufuma ku Cebo, Lesa lyonse aletuma umubomfi Wakwe kuli aba bantu (lelo kunse ka bakasambilila wafya bulesa) pakutila engalungika isambilisho ilyabufi no kutungulula abantu ukubabweseshwa kuli Lesa.

Eico tulemona inkombe ya nshita ya cine lubali ukwisa, kabili ena ni kasesema.

Kabili tatulemona fye iyi nkombe ukwisa muno mu Kusokolola 10:7, lelo tulesanga ukuti Icebo cilelandwa pali Eliya ukwisa lintu Yesu talabwela. Muli Mateo 17:10, “Na basambi Bakwe bali Mwipwishe, abati, Nga kanshi cinshi ico bakalemba basosela abati lelo Eliya ali no kubala esa?” Kabili Yesu atile, “Cine cine Eliya akesa intanshi, no kubweseshamo fyonse.” Lintu ukwisa kwa kwa Shikulwifwe takulati, Eliya alingile ukubwela ku mulimo wa kubwekeshapo mu lukuta. Ifi efyo Malaki 4:5 alesosa, “Moneni Nkatuma kuli imwe Eliya kasesema ku kutangililo kwisa kwa bushiku bwa kwa Yehova ubukulu kabili ubwa kutinya: nao akabweseshwa imitima ya bashibo pa bana, ne mitima ya bana pali bashibo, epali naisaume calo ku citipu.” Tapali icine cine ukutwishika ukuti Eliya alingile ukubwela lintu ukwisa kwa kwa Yesu takulati. Nakwata umulimo umo uwakupwilikisha. Ulya mulimo e ciputulwa ca Malaki 4:6 ico icisosa “aka bweseshwa imitima ya bana kuli bashibo.” Umulandu uo twaishibila ukuti uyu emulimo wakwe uwapelwa ku kucita pali ilya nshita ni pamulandu wakuti napwisha kale iciputulwa icisosa ukutila “aka bweseshwa imitima yabashibo ku bana,” ilyo bukapyunga bwakwa Eliya bwali pamo muli Yohane Kabatisha. Luke 1:17, “Kabili wene aka Mutangilila mu Mupashi na maka yakwa Eliya, ku kupilibwile mitima ya bashibo ku bana, no kupilibwila ba cintomfwa ku kushilimuka kwa Balungama, ku kupekanishisha Shikulu abantu abateyanishiwa.” Muli bukapyunga bwa kwa Yohane “imitima ya bashibo yapilibwilwe ku bana.” Twalishiba cilya pantu Yesu efyo asosele. Lelo tailesosa ukutila imitima yabana yapilibwilwe kuli bashibo. Cilya cali nokwisa citika. Imitima ya bana ba bushiku bwakulekelesha ikapilibwilwa kuli bashifwe ba Pentekosti. Yohane alibulile bashibo ukubateyanya kuli Yesu ku kusengelela abana mwi cinka. Nomba uyu kasesema uo pali wene Umupashi wakwa Eliya ukawila akateyanya abana ku kusengela Yesu nga abwela.

Yesu aitile Yohane Kabatisha, Eliya. Mateo 17:12, “Lelo Ndemwebwa nati Eliya alisa kale, kabili tabamwishibe, lelo bamucitile conse ico balefwaya.” Umulandu uo aitile Yohane Eliya, ni pamulandu wakuti Umupashi umo wine uwali pali Eliya wabwekele pali Yohane, nga filya ulya Umupashi wabwekele pali Elisha panuma yakuteka kwa Mfumu Ahab. Nomba nakabili ulya Mupashi uuli nokwisa pa muntu naumbi lintu fye Yesu talati kwisa. Akaba kasesema. Akashininkishiwa nga filya na Lesa. Apo Yesu, Umwine, mu mubili takabe pano ku kumushininkisha, (nge fyo Acitile Yohane) cikacitwa na Mupashi wa

Mushilo pakutila ubu bukapyunga bwa uyu kasesema bukakwata ne filangisho ifisuma kabili ifikalamba. Nga kasesema, ubusokololo bonse bukashininkishiwa, pantu ubusokololo bonse bukesa fikilishiwa. Imilimo iisuma iya maka ikacitwa pakulanda kwakwe mu citetekelo. Elyo kukaletwa imbila iyo Lesa amupela mu Cebo ukupili-bwila abantu ukubaleta ku cine na maka yakwa Lesa aya cine. Bamo bakomfwa, lelo abengi bakaba aba cine kufya fishilano no kumukana.

Apo uyu kasesema inkombe uwa Kusokolola 10:7 ali nokuba cimo cine nga Malaki 4:5-6 ali nokuba mucifyalilwa nga Eliya na Yohane. Bonse babili bali abaume abapatwilwe ukufuma ku masukulu ayasuminishiwa aya bukapepa mu bushiku bwabo. Bonse babili bali abaume ba mu ciswebebe. Bonse babili balebomba fye ilyo bakwete “Efyo asosa Shikulu,” ukufuma fye kuli Lesa mu busokololo. Bonse babili bakalipile no kususha imitantinkile ya bukapepa ne ntungulushi shabushiku bwabo. Lelo tacali fye ifyo iyo, bakalipile no kususha bonse abali ababifi atemwa bali nokubifya abanabo. Kabili moneni, bonse babili baseseme nganshi ukususha abanakashi ba bulalelale ne misango yabo. Eliya abilikishe ukususha Yesabele, kabili Yohane aebawile Herodias, umukashi wakwa Philipo.

Nangu takabe uwalumbuka, akashininkishiwa na Lesa. Ngefyo Yesu ashininkishe Yohane, kabili na Mupashi wa Mushilo wa shininkishe Yesu, naifwe bene kuti twasubila uyu muntu icakubalilapo akashininkishiwa no Mupashi ukubomba mu bumi bwakwe mu milimo ya maka iyo ishingana sushiwa kabili tayakasangwe ukuli konse; na Yesu Umwine, mu kubwela, akamushininkisha ena, ngefyo Ashininkishe Yohane. Yohane apele ubunte ukuti Yesu aleisa, — kabili noyu muntu, nga Yohane, akapela ubunte ukuti Yesu aleisa. Kabili ukwisa kwine kwa kwa Kristu ku kashininkisha ukuti icine cine uyu muntu ali uwakutangilila ukwisa Kwakwe ukwa cibili. Ici ecishininkisho cakulekelesha ukuti uyu icine cine ni kasesema wa Malaki 4, pantu impela ya nshita ya Benafyalo ikaba ni Yesu, Umwine, ukumoneka. Elyo cikaba kucelwa nganshi kuli abo abamukene.

Pakuti tuye pantanshi mukulondolola kwesu pa kulangisha pali uyu kasesema wa bushiku bwakulekelesha, katumone sana sana ukuti ulya kasesema wa muli Mateo 11:12, ali Yohane Kabatisha, uyo ewali uwalandilwa libela muli Malaki 3:1, “Moneni; Nkatume nkombe Yandi, kabili akapekanye nshila ku ntanshi Yandi; kabili Shikulu, Untu mufwaya, akesa no kupumikisha kwi tempele Lyakwe, Neyi e Nkombe ya Cipingo, Intu imwe mubekelwa; moneni, lleisa, e fyo Yehoba wa Milalo asosa,” Mateo 11:1-12, “Nomba caishile citika, ilyo Yesu apwishishe ukweba abasambi Bakwe ikumi na babili, Afumineko alaya ku kusambilisha kabili ku kubila mu mishi yabo. Lelo Yohane pa kuumfwila mu cifungo imilimo ya kwa Kristu, atuminepo abasambi bakwe babili, nabo batile kuli Wene; Bushe ni we Uo batile Akesa, napamo tulelolela umbi? Na Yesu ali baswike kabili atile kuli bona ati, Kabiye ni no kulondolola kuli Yohane nakabili ifyo fintu ifyo muleumfwa no kumona: impofu shilemona, abalemana amolu baleenda, aba fibashi balesangululwa, naba nkoma matwi baleumfwa, abafwa balebushiwa, na

babusu balebililwa imbila nsuma. Kabili alishuka, uushi ipununa ku ca muli Ine. Awe balya ilyo balebwelelelamo, Yesu atendeke ukusosa ku mabumba palwa kwa Yohane ati, Cinshi mwaile ku kumona ku ciswebebe? Bushe litete ilitenshiwa ku mwela? Lelo cinshi mwaile ku kumona? Bushe muntu uwafwale fya kufwala ifyakukumbilako? Moneni, abafwale fyakumbilika bali mu mayanda ya shamfumu. Lelo cinshi mwaile mu kumona? Kasesema? ee, Ndemweba nati, kabili uwacila kasesema. Pantu ena ulya, ewalembelwe ukuti. Mona, ndekutangishishe nkombe Yandi ku ntanshi Yobe, intu Ikakuwamishishe nshila Yobe. Ndemwebe cine cine nati, Mu bafyalwa ku banakashi tamwaiminine uwacila Yohane Kabatisha: lelo uwacepesha mu bufumu bwa mu mulu mukalamba kuli wene.” Ici cali citike kale. Ici cali citika. Calipwa. Lelo nomba moneni muli Malaki 4:1-6, “Pantu moneni, ubushiku buleisa, ubulepya nge buku; kabili bonse abamiya, yea, na bonse abacita ubufifi, bakabe fisoso; no bushiku ubuleisa bukababilimya, e fyo Yehoba wa milalo asosa, pa kuti tabwakabashile umushila nangu umusambo. Lelo kakatulila imwe mwe batine Shina Lyandi Akasuba ka Bulungami akali no kuundapa mu mapindo Yakwe; na imwe mukafuma, no kupontauka nga bana ba ng’ombe abafumo mwa kukakilwa. Kabili mukanyantaula ababifi; pantu bakabe mito mwi samba lya nyantilo sha makasa yenu mu bushiku umu Nkacita ici, e fyo Yehoba wa milalo asosa. Ibukisheni amalango ya kwa Mose umubomfi Wandu, ayo Namwebele mu Horebu aya pali Israel onse, ifipope ne fya bupingushi. Moneni, nkatuma kuli imwe Eliya kasesema ku kutangililo kwisa kwa bushiku bwa kwa Yehoba ubukulu kabili ubwa kutinya: Nao akabweseshishe mitima ya bashibo pa bana, ne mitima ya bana pali bashibo, epali naisaume calo ku citipu.” Moneni, lilyalino panuma ya kwisa kwa UYU Eliya, isonde likasangululwa no mulilo kabili na babifi bakocewa ukube mito. Elyo kabili, ici TACACITIKE mu nshita ya kwa Yohane (Eliya uwa bushiku bwakwe). Umupashi wakwa Lesa uwa seseme ukwisa kwa nkombe muli Malaki 3:1 (Yohane) ali lelo ukubwekeshapo ilyashi Lyakwe ilyantanshi ilyabusesemo ilya Esaya 40:3 ilyapangilwe nalimo ubwikashi bwa imyanda itatu kunuma. “Ishivi lya uyo ulebila mu matololo. Teyanyeni Yehoba inshila umwakupita, tambalikeni umusebo wakwa Lesa wesu mu ciswebebe.” Nomba Yohane, mu Mupashi wa Mushilo, abilishishe bonse babili Esaya elyo na Malaki muli Mateo 3:3, “Pantu uyu e wasoselwe kuli Esaya kasesema, ati, ishiwi lya ulebilikisha mu matololo, Teyanyeni umwa kupita Shikulu, lungamikeninshila Shakwe.” Eico kuti twamona ukufuma muli aya Malembo ukuti kasesema muli Malaki 3, uwali ni Yohane, TALI ni kasesema wa Malaki 4, nangu icine cine, *bonse babili Yohane na uyu kasesema wa buno-bishiku bwakulekelesha nabakwata pali bena Umupashi umo wine Uwali pali Eliya.*

Nomba uyu kasesema uwa Malaki 4 no Kusokolola 10:7 ali nokwisa cita ifintu fibili. Icantanshi: Ukulingana na Malaki 4 akabwesha imitima ya bana kuli bashibo. Ica cibili: Akasokolola ifyankama ifya fibulumo cinelubali mu Kusokolola 10 ifyo ifyaba amabusokolola ayaba mu fikakatiko cinelubali. Cikaba ifi “fishinka-ifyankama” ifyasokololwa ifya Bulesa efikabwesha bwino bwino imitima ya bana kuli bashibo baci Pentekosti. Ififine efyo cili.

Lelo tontonkanyeni ici naco. Iyi nkombe-kasesema ali nokuba mu cifyalilwa cakwe ne misango nge fyo ali Eliya na Yohane. Abantu ba muli ubu bushiku bwa uyu kasesema-inkombe bali nokuba nge fyo bali mu bushiku bwa kwa Ahab, na mu bwakwa Yohane. Kabili apofye cili nokuba “ABANA BEKA FYE” abo imitima yabo ikabweshiwa, cili nokuba fye abana ebali no kumfwa. Mu nshiku shakwa Ahab 7,000 beka imbuto iyacine ya bena Israel ebasangilwe. Mu bushiku bwa kwa Yohane mwali namo mwine abanono sana. Icintu bwingi mu nshita shonse ishi shibili bali mu bulalalele bwa kupepa utulubi.

Ndefwaya ukupanga icilangisho nacimbi cimo pakati ka nkombe-kasesema iya mu Laodikea na Yohane, inkombe-kasesema iyatangilile ukwisa kwa kwa Yesu ukwa ntanshi. Abantu mu bushiku bwakwa Yohane bamubikile ukuba Messiah. Yohane 1:19-20, “Kabili ili elyashi lya kwa Yohane, ilyo aba Yuda aba mu Yerusalemu batumineko bashimapapo na bena Lebi ku kumwipusha abati, Niwe ani? Alisuminishe, no kukana iyo; lelo ali suminishe ati, Ine nshili Kristu.” Nomba iyi inkombe-kasesema ya bushiku bwa kulekelesha ikakwata amaka yamo kuli Shikulu ukuti kukaba abo abakamwita ena ukuba Shikulu Yesu. (Mukaba umupashi mu calo pa nshita ya mpela ukalembelaka bamo no kubalenga ukucetekela ici. Mateo 24:23-26, “Pantu ba Kristu wa bufi, na bakasesema wa bufi bakema, no kulenge fishibilo fikalamba ne fya kupapa; ifya kuti, balufye na basalwa bene, nga cabe cingacitwa. Moneni, nimwebela kabela. Eico nga bakamweba abati, Moneni, Ali mu ciswebebe; mwifuminako; moneni, Ali mu muputule wa mu kati; mwisumina.”) Lelo mwikacetekela ico. Tali ni Yesu Kristu. Tali Umwana wa kwa Lesa. NI UMO UWA BAMUNYINA, KASESEMA, INKOMBE, UMUBOMFI WA KWA LESA. Tafwaya umucinshi ukalamba ukupelwa kuli wene nga ulya uo Yohane apokele lintu ali ishiwi iya lebilisha, “Ine te ENA, LELO ALEISA KUNTANSHI YANDI.”

Lintu tatulaisala ici ciputulwa pa nkombe iya Nshita ya Loadikea, tulingile twatontonkanya sana aya amatontonkanyo yabili. Intanshi, iyi nshita ikakwata UMO Kasesema-Inkombe. Ukusokolola 10:7, yasosa, “Ilyo ena (umo) akatendeka ukubilisha.” Tapatala ukubapo inshita uko Lesa apele abantu Bakwe bakasesema babili abakalamba pa nshita imo. Apele Enock (eka); Apele Noah (eka); Apele Mose (ena eka alikwete Icebo nangu bamo baliseseme); Yohane Kabatisha aishile EKA. Nomba muli buno bushiku bwakulekelesha kuli nokuba KASESEMA (te kasesema mwanakashi — nangu cibe muli ino nshita mwaliba abanakashi abengi abasosa ukuti balapela ubusokololo bwa kwa Lesa ukucila abaume), kabili ne Cebo icishifilwa casosa ukuti ena (kasesema) aka sokolola ifyankama ku bantu abanshita ya kulekelesha, no kubwesha imitima ya bana kuli bashibo. Kwaliba balya abasoso kuti abantu ba kwa Lesa bali no kwisa capamo ukupitila *mubusokololo ubwe bumba*. Ndesusha ayo amashiwi. Tayali nangu cimo, ninsoselo iya nenuka mu cinso ca Busokololo 10:7. Nomba nshilekana ukuti abantu bakasesema muli ino nshita iya kulekelesha kabili bukapyunga bwabo kuti bwaba nangu ukwisaba ubwalungama. Nshilekana ukuti takwakabe bakasesema ngefyo cali na munshiku shakwa Paulo ilyo kwali “umo

Agabus kasesema uwa seseme pa mulandu wa nsala.” Ndesumina ici cili nokuba ifyo fine. LELO NDEKANA PA CISHININKISHO ICAPWILILIKA ICA CEBO UKUTI KWALIBA UKUCILA PALI KASESEMA-INKOMBE UMUKALAMBA UMO UYO UKASOKOLOLA INKAMA NGEFYO SHABA MU CEBO, KABILI UYO UWAKWATA BUKAPYUNGA UBWA KUBWESHA IMITIMA YA BANA KULI BASHIBO. “Efyo asosa Shikulu” pa Cebo Cakwe icishifilwa ukwiminina, kabili cikeminina no kushininkishiwa. Kwaliba kasesema-inkombe umo kuli ino nshita. Pa mufula wamicitile ya buntunse yeka, uuli onse alishiba ukuti apo apali abantu abengi palaba ubulondoloshi ubwapusana pa fishinka ifinono ifye sambilisho likalamba ilyo bonse bekatilila capamo. Kanshi nomba ninani uyo uli noku kwata amaka aya bulo kulufyanya ayali no ku bwekeshiwa muli ino nshita iya kulekelesha, pantu ino nshita iyakulekelesha ili no kuya ukubwelela mukulangisha Nabwinda Uwapwililika Uwa Cebo? Ico cilepilibula tuli no ku kwata Icebo umuku naumbi nge fyo capelwe icapwililika, kabili no kumfwika ukwapwililika munshiku sha kwa Paulo. Ndi no kumweba uyo ukacikwata. Cikaba ni kasesema uli no kushininkishiwa bwino bwino, atemwa icashininkishiwa bwino bwino sana ukucila ifyo cali kasesema uuli onse mu nshita shonse ukufuma pali Enoch mpaka bunu bushiku, pantu uyu muntu nge cikankala aka kwata bukapyunga bwa busesemo ubwe libwe lya kwisalilako, na Lesa akalangisha ena pa mbilibili. Takakabile ukuilandila umwine eka, Lesa akamulandilako ukupitila mwi shiwi lya cishibilo. Amenii.

Itontonkanyo lya cibili ililingile ukusekesha imitima yesu lya kutila inshita sha nkuta cinelubali shatendeke no mupashi wa bumukanya Kristu ukubikapo nao Mupashi wa Mushilo Uyo uli uwapalwa umuyayaya. 1 Yohane 4:1, “Mwe batemwikwa, mwitetekela mupashi onse, lelo esheni mipashi mwishibe nga yafuma kuli Lesa: ico *bakasesema* wa bufi abengi nabafumina pano isonde.” Bushe na mumona? Umupashi wa bumukanya Kristu wishibikilwa pamo nabakasesema wa bufi. Inshita shaishilemo na bakasesema wa bufi kabili shili no nokupwa na bakasesema wa bufi. Nomba nelyo line kuli nokubako KASESEMA UMUTUNTULU UWA BUFI mu bukulu bwa mano yene yaulya muntu uwalumbulwa mu Busokololo. Nomba nge lelo ilyo ukusokolola kwakwe takulati kubepo kuli no kumoneka bakasesema wa bufi abengi. Mateo 24:23-26, “Lilya ngo muntu akatila kuli imwe, Moneni, Kristu ali pano, nalimo ali palya; mwikasumina. Pantu ba Kristu wa bufi, na bakasesema wa bufi bakema, no kulange ifishibilo fikalamba ne fya kupapa; ifya kuti, balufye na basalwa bene, nga cabe cingacitwa. Moneni, nimweba kabeli. Eico nga bakamweba abati, Moneni, Ali mumatololo; mwifuminako: moneni, Ali mu muputule wa mukati; mwisumina.” Aba bakasesema wa bufi balilembelwa palwa ifwe mu Malembo nayambi ayengi ngeli lyakonkapo. 2 Petro 2:1-2, “Lelo kwali ba kasesema wa bufi pakati kabantu, ifyo na muli imwe mukaba bakasambilisha wa bufi, abantu abakaletamo ku mbali ifya bucaibela fya konaula, abakana Shikulu wabo Uyo uwabashitile abailetelela ku boni ubuleisa bwangu. Na bengi bakakonke fya bulalalale fyabo; pa mulandu wa abo Inshila ya cine



ikapontelwa.” 2 Timote 4:3-4, “Pantu ikesa nshita ilyo bakakano kusambilishiwe isambilisho ilituntulu; lelo bakailonganisha bakasambilisha umwabelo ulunkumbwa lwabo lwine, pa kuba abapepula amatwi; kabili bakapepula amatwi yabo ku Cine, no kwalukila ku milumbe.” 1 Timote 4:1, “Lelo Umupashi wasosa no kushimika, ukuti mu nshita ishikakonkapo bamo bakafutukako ku citetekelo, pa kwangwe mipashi ya kulufya, na masambilisho ya fiwa.” Nomba mu mulandu uuli onse muli no kumona ukuti kasesema wabufi ni uyo uwaba kunse ka Cebo. Nge fyo twamulangile ulya “mukanyakristu” cipilibula “mukanya Cebo” eico aba bakasesema wa bufi baleisa mukupilibula Icebo, ukucipela ubupilibulo ubo ubwalingana ne mpela yabo iyabuciwa. Bushe mwalitala mona ifyo abantu abo abatungulula abanabo mukulubantika balabakaka ku bene beka no mwenso? Basoso kutila nga abantu tabalecita ifyo balesosa, nangu nga baya, elyo ubonaushi bukesa. Ni bakasesema wa bufi, pantu kasesema wacine lyonse akatungulula umo ku Cebo no kukaka abantu kuli Yesu Kristu kabili takebe abantu ukutina ena nangu ifyo asosa, lelo ukutina ifyo Icebo cisosa. Moneni ifyo aba bantu nga Yuda baba kulya pa mulandu wa ndalama. Balalenga imwe ukushitisha fyonse ifyo mwakwata no ku-fipela kuli bene ne ncito shabo. Balaposa inshita itali pa musangulo ukucila Icebo. Abo abesha ukubomfya ifyabupe balinokubomfya icabupe umwaba akashilwa ka cilubo muli cena elyo no kulomba indalama, no kukana Icebo no kuciita ukuba icakwa Lesa. Kabili abantu bali nokuya kuli bena, no kuumfwana nabo, no kubafwilisha, no kubacetekela, ukwabula ukwishiba ukuti ninshila ya mfwa. Eeh, impanga yaisula naba kapashanya ba mano ya buntunse. Mu bushiku bwakulekelesha bakesha ukukonkeleshamo ulya kasesema-inkombe. Abana baume cinelubali bakwa Skeva bafwaile ukukonkeleshamo Paulo. Simoni indoshi ali eseshe ukukonkeleshamo Petro. Ukupashanya kwabo kukaba kwa buntunse. Tabakatale ukuleta ifyo kasesema wacine akaleta. Ilyo akasosa ukutula ukupuputulwa nakupwa bakenda monse ukusosa ukuti nabakwata ubusokololo ubukalamba ukuti ifyo abantu bakwete fili ifyalungama kabili na Lesa ali nokucita ifintu ifikalamba kabili ifingi ifisuma pakati ka bantu. Kabili abantu bakawilila cena. Aba bene bakasesema wa bufi bakasosa kuti inkombe ya bushiku bwa kulekelesha tayali ni kasambilila wa fya bulesa, eico talingile ukumumfwila. Tabakatale ukuleta ifyo inkombe ingaleta; tabakashininkishiwe na Lesa nga ulya kasesema uwa bushiku bwakulekelesha acita, lelo na mashiwi yabo ayakalamba ayabufi kabili no kufina kwabo kwa kulumbukwa kwabo kubi ukwe sonde-lyonse bakasoka abantu ku kukana umfwa ulya muntu (inkombe) kabili bakasoso kuti alasambilisha ubufi. Balecita filya fine fye nga bashibo, ama Fariseo, abo abali bakwa ciwa, pantu batile bonse babili Yohane na Yesu basambilishe icilubo.

Nomba cinshi ico aba bakasesema wa bufi besa mu kususha kasesema wa cine no kukanasumina isambilisho lyakwe? Pantu baliba abacine ku fishilano nge fyo bacitile ifikolwe fyabo ilyo mu nshiku shakwa Ahab bakenye Mikaya. Bali imyanda ine iyabena *kabili bonse capamo bali umfene; kabili na bonse capamo ukusosa icintu cimo cine,*

*balitumpike abantu*. Lelo kasesema UMO — *umo fye* — ewalungeme kabili nabashala bonse balilubile pantu Lesa alipele ubusokololo UMO FYE.

Cenjeleni na bakasesema wa bufi, pantu mimbulu ya kutakanya.

Nga cakutila mucili no kutwishika ukuli konse pali ici ipusheni Lesa ukupitila mu Mupashi Wakwe ukumwisusha no kumutungulula, PANTU ABASALWA BENE TEKUTI BATUMPIKWE. Bushe namumfwa ico? Tapali umuntu nangu umo unga mutumpika imwe. Paulo tatumpike uwasalwa uuli onse, nga cakuti ali lubile. Kabili muli ilye Nshita ya ntanshi ya Efeso abasalwa kulya tekuti batumpikwe pantu balyesesh abatumwa ababufi na bakasesema no kubasanga ukuba ababufi no kubafumya kunse. Hallelujah. Impaanga SHAKWE shilomfwe shiwi Lyakwe kabili bala MUKONKA. Amen. Nalicicetekela.



#### INTUMBA YA MULILO

Intumba ya Mulilo pa mulu wa mutwe wakwa Munyina Branham ya kopelwe ku Houston, Texas, mu January mu 1950, kabili yalemukonka ena ukufuma mu kufyalwa kwa kwe mu 1909. Munshita ya mulimo wa lubatisho mu 1933 mu Mumana wa Ohio ku Jeffersonville, Indiana, ici Cibumbwa cakupapusha camonekele pakati ka bantu imyanda ne myanda, ukusosa kuli wene, “Nge fyo Yohane Kabatisha atangilile ukwisa kwa ntanshi kwa kwa Kristu, ukatangilila Ukwisa Kwakwe Kwacibili.”

Iyi Mbila na Munyina William Marrion Branham, *Inkombe kabili Ukusoka Ukwakulekelesha Ukwa Mupashi*, yasendelwe ukufuma mu Nshita ya Nkunta ya Laodikea icipandwa ce buku lyakwe ca mutwe we lyashi *Ubulondoloshi Bwa Nshita Sha Nkuta Cinelubali*, kabili yalembwa umu ukwabulo ukufumyamo kabili lipelwa ilya bupe fye na ba Voice of God Recordings. Lyalembelwe mu Cibemba mu 1995.

Amashiwi ayali ku nkupo ya kunuma yafumishiwe mukati kaili line ibuku.

BEMBA

©1995 VGR, ALL RIGHTS RESERVED

Imbila sha ntendekelo na Munyina William Marrion Branham shali yambulwa pali maginetiki tepu, shabapo 1100 no kucila, kabili shiletwa ukwabula ukubikamo fimo. Ishingi ishi mbila shaba mu musango we buku, ukulembwa ukwabula ukushamo kabili no *kupelwa ishabupe fye*. Ama tepu, ama buku, ama filimu, ifikope, kabili ne lyashi limbi lya bwafwilisho pali bukapyunga bwakwe ubwe sonde lyonse epo fili nga mwalembela:

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

[www.branham.org](http://www.branham.org)

# Ukusoka Kwa Kulekelesha Kwa Mupashi

Ukusokololola 3:22, “Uukwete ukutwi, omfwe ico Umupashi ulesosa ku nkuta.”

Uku e kusoka kwa KULEKELESHA. Takwakabe nakumbi. Icipinda ca cipuna ca bufumu na cibikwa. Imifula ikumi limo na ibili naitantikwa. Imisebo ya golde naipangwa. Impongolo sha magariti umusuma na shimikwa no ku kwikwa. Nga pyramid naiminina ubusaka kabili no bukata. Ifibumbwa fya mu mulu ifya upekanya balelolekesha ukwabulo kupema, pantu ubengeshima no kubalika no bukata ubushili bwe sonde. Iciputulwa conse ica kuyemba kwa kwe cilande lyashi lya nkumbu shakwe shakupapusha ne citemwiko cakwa Yesu. Wene musumba uwa pekenishiwa ku bantu abapekanishiwa. Wene alelolela fye abakwikalamo bakwe, kabili nombaline bakalaenda mu misebo yakwe ne nsansa. Eeh, bwite ubwakulekelesha. *Umupashi tawakasose mu nshita imbi*. Inshita nashipwa.

Lelo ndetasha Lesa, pali kano kashita, ino nshita tailapwa. Acili alebilisha. Kabili ukubilisha Kwakwe takuli fye mu matwi ya bantu aya mu mupashi, ku mupashi Wakwe, lelo nakabili kasesema ali mu calo. Umuku naumbi Lesa ali nokusokolola icine nge fyo Acitile kuli Paulo. Mu nshiku sha nkombe yalenga cine lubali, mu nshiku sha Nshita ya Laodikea, inkombe yakwe akasokolola ifyankama fya kwa Lesa nge fyo shasokolwelwe kuli Paulo. Ali nokulandikisha, kabili balya abakapokelela ulya kasesema mwi shina lyakwe bakapokelela amapalo ayakaletwa aya bukapyunga bwa ulya kasesema. Kabili balya abamumfwa bakapalwa no kuba icilundwa caulya nabwinga wa bushiku bwa kulekelesha uyo walumbulwa mu Busokololo 22:17, “Umupashi na nabwinga batila iseni.” Inseke ya ngano (Nabwinga wa Ngano) ulwaponene mu mushili pa Nicaea nalwisa nakabili ku Cebo Uluseke lwa ntendekelo nakabili. Lesa alumbanishiwe umuyayaya. Eeh, kutikeni kuli kasesema uwa shininkishiwa uwakwa Lesa ulemoneka mu nshita yakulekelesha ino. Ifyo alesosa ukufuma kuli Lesa, nabwinga ali nokusosa. Umupashi na kasesema na nabwinga bakalasosa icintu cimo cine. Kabili ifyo bakasosa fikaba ifyalandwa kale mu Cebo. Balesosa ci nomba, “Fumeni pakati kakwe nomba no kupatukako.” Ukubilikisha nakuya konse. Ukubilikisha kucili konse. Ishiwi ili no kubilikisha ukufika lilali? Tatwishibe, lelo icintu cimo natwishiba, tayakatwalilile pantu ino ni nshita ya kulekelesha.

Uyo ukwete ukutwi, lekeni omfwe ifyo Umupashi ulesosa ku nkuta. Umupashi na usosa. Akasuba akalewa kali mupepi ukushimina mu muyayaya ku nshita sha nkuta. Elyo cikaba empela ya fyonse. Elyo mukacelwa ukwisa. Lelo nga pa cifulo cimo mu masambilisho ayo Lesa na bombela pali imwe ukupitila mu Mupashi Wakwe, shi nangu nombaline pilibukileni kuli Wene mu kulapila no kupela ubumi bwenu kuli Ena ukuti ukupitila mu Mupashi Wakwe Enga mupela umweo wa muyayaya.

**“EFYO ASOSA SHIKULU”**

**“ishiwi lya nkombe yalenga cine lubali”**

**“kasesema-inkombe imo kuli ino nshita”**

**“amaka ayabulo kulufyanya”**

**“bukapyunga bwabusesemo bwelibwe  
lya kuisalila”**

**“kasesema inkombe ya Kusokolola 10:7”**

**“cimo cine nga Malaki 4:5-6”**

**“ukulangishiwa na Lesa”**

**“ukushininkishiwa na Mupashi”**

**“katangilila wa kwisa Kwakwe kwa cibili”**

## Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalebwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)